

DATUA

Lehen hiru kilometroak

Lehen kilometroa. Antonio Karmona eta Josu Sarriegi Alaveseko jokalariek egin zuten, Andra Maria Zuriaren plazatik abiatuta.

Bigarren kilometroa. Juan Jose Ibarretxe EAeko lehen-dakaria, Aholku Batzordeko zenbait kidek lagunaduta, tartean, Mari Karmen Garmendia Kultura sailburua.

Hirugarren kilometroa. Zeledonek egin zuen, Gasteizko Blusen Elkarteko kideekin batera.

ko; haien artean Jon Arretxe idazlea eta Mikel Urdangarin kantariak.

Giro ederra eta jende ugari, Gasteiz utzi arte

Arabako hiriburuan kilometro ugari egin zituen Korrikak, eta guzti-guztietan jende andanak parte hartu zuen lasterka. Begira ere milaka jendek agurtu zuen Korrika. Batzuek irifarrez, besteak jakin-minez. Izan zen ere saltoka agurtu zuenik ere. Errege Katolikoen ondoko gasolindegiko langileak hala eman zion ongietorria, saltoka, «kaixo Korrika» oihukatuz.

Umeak ere erakartzen ditu lasterketak, baduelako zoramen puntu bat. Kaleetan zehar «korrika-korrika» oihukatuz, gelditu gabe doan jende oldea, ikusgarria da zuzenean parte hartzen ez dutenentzat ere.

Zeledonen ostean, El Corte Inglesko ordezkari batek hartu zuen lekukoa, eta haren ostean: LAB, ELA, EILAS sindikatuek, Ekialde Institutuak, Naipes Fournierreko langileek, Olari-zuko auzokideek, udaletxeko langileek, Judimendiko kultura batzordeak, Vital Kutzako langileak, Eusko Jaurilaritzakoak, Koldo Mitxelena Institutuak, Amnistiaren Aldeko Batzordeak, Toki Eder Ikastolak, HBko ordezkariak, Euskaltzaleon Elkarguneak, Euskadiko Kutzako langileak... Inork ez zion hutsik egin nahi izan euskararen aldeko atxikimenduari. Eusko Jaurilaritzako langileen kilometroaren bigarren zatia Mondragon Unibertsitatearen bidez truke programa batean diren Erdialdeko eta Hego Amerikako indigena talde batek eraman zuen, mundua euskarara bildu zela egiazki frogatzeko.

Euskaltzaleon Elkarguneak hsartu zuen lekukoa Parte Zaharrera, eta hara sartzerakoan, are jende gehiago hurbildu zitzaion festari. Arik eta Eroskiko biribilgunetik barrena, Astegietara igaro arte. Handik Arabako herri txikiagoek egin zioten harra Korrikari.



MIREN SAEZ

Xabier Ugalde, Korrikako arduraduna, Antonio Karmonari lekukoa ematen.

Euskarari ofizialtasuna eta aldeko politikak zor zaizkiola esan du AEK-k

«Gurearen alde eginez, munduko hizkuntza guztien alde egiten dugu», adierazi zuten Korrika abiatu aitzineko mezuan

I. Petxarroman | GASTEIZ

«Korrikaren bidez mundu guztiari esan nahi diogu hemen herri bat dagoela, bere hizkuntza eta kultura gorde eta garatu nahi dituen, jakin badakielako bere hizkuntzaren alde eginez, mundu hizkuntza guztien alde egiten duela». Ane Agirregomezkorta Arabako AEK-ko arduradunak atzo Gasteizen, Korrika abiatu aitzinean irakurri zuen mezua: «Mundua bat euskarara bildu. Izan ere, AEK-ko arduradunaren esanetan, «hizkuntza bat galtzen den bakoitzean, gainerako guztiak pobreako bihurtzen dira; eta guk ez dugu gure hizkuntza desagertzen ikusi nahi. Mundua tristeagoa, pobreako eta grisagoa izango litzateke euskararik gabe».

Mundua bat bildu zen jadanik Gasteizko Andra Maria Zuriaren Plazara, jende andana Korrika 12ren hasiera ikustera. Haien aurrean eman zuen mezua AEK-k, mezu argia euskararen ofizialtasunaren eta haren aldeko sustapen politiken alde. «Euskal Herriak euskara berreskuratu nahi du», esan zuen Agirregomezkortak, «bere hizkuntza gainerakoekin parean jarri, eta horrek izena



MIREN SAEZ

Jende andana bildu zen lehen kilometroetan.

dauka gaur egun eta hemen: ofizialtasuna».

Izan ere, euskarari ofizialtasuna zor zaiola nabarmandu zuen AEK-ko eleduak, eta bere eleduen hizkuntza eskubideen errespetatzea. «Euskarak dagokion lekua erdiesteko sustapen politikak jarri behar dira abian, justiziak eta elkarrenganako begiruneak hala eskatzen dutelako, euskaldunok horretarako eskubidea dugulako, eta, batez ere eus-

kal gizartearen nahia horixe delako».

Jendeak parte hartzearen garrantzia

Illo horretan, Korrikara milaka eta milaka lagun biltzearen garrantzia azpimarratu zuen Ane Agirregomezkortak, «munduari argi eta ozen adierazteko zein den euskal gizartearen nahia, euskal gizartearen hautua oztopo guztien gainetik».

ANIZTASUNA

«Hizkuntza bat galtzean gainerako guztiak pobreako bihurtzen dira; guk ez dugu gurea desagertzerik nahi»

OFIZIALTASUNA

«Euskal Herriak euskara gainerako hizkuntzen parean jarri nahi du, eta horrek izena dauka: ofizialtasuna»

PARTE-HARTZEA

«Munduari ozen adierazi behar diogu zein den euskal gizartearen nahia oztopo guztien gainetik»

Izan ere, AEKko kidearen iritziz, «munduko kultura guztiek dute bizitzeko eskubidea». «Gureak ere bai, noski. Harrokeriarik gabe eta tinko. Gainerako kultura eta hizkuntzak errespetatuz. Geuk kolore askotariko mundu horretako partaide izan nahi dugu. Eta gure ekarpena euskaraz, gure hizkuntzaren bidez egin nahi dugu». Eta lehen lekukoarekin batera, festa lehertu zen Gasteizen.